

度

支

奏

議

功令倍爲森嚴查叅法無輕貸各官或以遼餉或以京邊或以漕糧金花或以漕折輕賚纒逋時日卽罹叅罰壯縣巨邑尤多桂礙甚有錢糧已經起解在途而叅罰仍不免者究竟稍需歲月錢糧完解據有撫按咨文次則司府申呈一以錢糧到部爲主該司查明說堂臣部卽爲具題開復原未盡錄撫按題

請且亦從無必待撫按題

請之例也蓋向來逋賦多錄臣部及太倉科道督餉

御史截叅歲叅又有京卿摘叅

臣部

覲叅巡漕巡鹽巡青光祿監兌等叅然諸臣多止題叅罰而不題開復其各省直撫按有欲代爲所屬開復者舊例惟以一咨達部聽候覆核類題所從來久矣迺今歲朝

覲之年羣吏畢集考選在通又有題

准新例先是崇禎三年十二月內臣部管理新餉右侍郎周士樸題有

覲官積欠可清一疏奉

聖旨計吏雲集即將天啓六年以後加派襍項錢糧
面質完欠具奏其有順資續解者酌量分數開復
陞考玩違罰處該部俱照近例行欽此詳玩

聖旨是明以開復之事下任之臣部矣臣部恪遵

明命確查完欠叅以撫按司府公移酌量開復用備
陞考實以遵奉

明旨而非敢有專擅也今復奉

旨通查臣謹再爲逐一臚列不敢隱徇漏遺其或一
官而二三叅罰亦二三開復者備爲開陳中有

會經奉罰完納月久而開復原在朝

觀之前者遠則數年近亦恆歲如丹徒知縣鄭之尹
長安知縣孫三傑江都知縣遲大成晉江知縣
姚孫渠同安知縣曹履泰興化知縣王績燦饒
平知縣戈尚友零陵知縣符應乾是也有叅罰
完納遠近遲速不等而開復偶當朝

觀之際者或糧完而咨題偶滯或罰新而次第輸將
如福清知縣周堪廣海澄知縣余應桂莆田知
縣吳彥芳金華知縣高倬長興知縣向鼎雒陽

知縣尹洗臨淄知縣耿胤樓嘉定知縣謝三賓
吳江知縣熊開元華亭知縣鄭友玄廬山知縣
余敬中臨海知縣萬永康祁門知縣朱大雅湘
潭縣知縣陳文燿是也以上各官開復皆准督
撫咨文餉院揭帖間有一二據藩司公移及本
官呈詞者皆再四覆覈無異期於錢糧通完而
已至於江陵知縣周瑞豹京邊已完惟黔餉一
項崇禎三年以前黔自爲政曾經查叅今歲入
覲瑞豹遵半解北部及順資續解之

旨完納如額臣部亦遵酌量分數開復陞考之

旨卽與開復特以道里迢遞川貴督臣不及與知疏
到後時致干

譴責其實完糧開復俱有左券瑞豹急公一念尚在
可原似應還其故物而非臣等所敢必也且
皇上所以慎重考成者憂深軍

國直爲清逋裕餉計耳今瑞豹補納已完而仍奪
之秩恐樂輸效職者從茲卻步矣非所以示勸
懲而廣風勵也此外則順德知縣黃金貴東莞

知縣李模陽江知縣李右謙靈山知縣黃學元
離任入

覲在預徵行文之先并榮澤知縣龐杰原無加派俱
誤入叅罰之例皆經司官薛邦瑞簡舉後以廣
東新餉解到逾額并據河南藩司咨呈臣部屢
疏具題業蒙

聖恩准令考選矣又如推官郭必昌楊希旦初以漕
輓稍遲爲總漕督臣查叅臣部原覆俟新運完

日聽撫按題

廣東奏請
請以故撫按代題開復又如知縣楊兆升劉宗祥朱
國棟先以省直輕賚未完奉有

明旨令總漕督臣查叅後經通完督臣代題開復此
皆奉有

特旨問一行之而非可執爲通例者也總之考選大
典奉

旨查覈臣等矢心天日一秉虛公其以錢糧未完而
不准考選者已十餘人實未敢毫有曲徇其間
今若錢糧已完者謬稱未完開復已明者妄稱

未明混淆白黑顛倒循良不惟獲戾於清議抑且得罪於

國法實臣之所大懼也仰冀

聖明俯念先今考選諸臣俱係數載勞吏錢糧通完已經開復考選

特賜優容不特言路宏開才雋吐氣而臣等亦可免於蔽賢之罪矣迺若開復一事此後猶有當酌議者案查本年十月內臣部查叅開復霑化知縣李景廉緣錄奉

聖旨知道了以後被罰官員例應開復該撫按卽舉
具題以示激勸欽此蓋爲撫按移咨開復遲緩特
爲責成原疏可查且其奉

旨申飭又在考選竣事之後者也目今省直糧完開
復各官撫按咨文已至而臣未經類題者尚十
餘人臣部趲趲未敢具疏今或照舊例而祇據
咨文開復或遵

新旨而必俟撫按代題又當請旨

聖裁以便頒布奉行而臣部不敢以臆決矣所有恭

罰開復各官年月緣繇開列疏後統祈

聖明裁答施行

計開

行取推官

杭州府推官郭必昌因崇禎三年糧運稽

遲總漕李待問疏叅奉

旨戴罪管事四年五月內該浙江撫按陸完學等題

爲舊運久竣新運獨蚤等事題

請開復本部覆奉

欽依在案

嘉興府推官楊希旦因崇禎三年糧運稽遲總漕李待問疏叅奉

旨戴罪管事四年五月內該浙江撫按陸完學等題爲舊運久竣新運獨蚤等事題

請開復本部覆奉

欽依在案

行取知縣

丹徒知縣鄭之尹崇禎二年四月內本部

覆巡視太倉科院查叅七年京邊未完
六分降職二級隨准應天巡撫曹文衡
咨稱全完於七月內開復訖

長安知縣孫三傑崇禎元年十一月內覆
餉院錢士貴叅二年加派未完住俸
二年七月內准撫院劉廣生咨本部於
直隸逮餉完欠疏內開復訖

江都知縣馮大成崇禎三年二月內覆餉
院沈猶龍叅二年加派未完住俸無

職名三年五月內准餉院沈慎

本部於元年餉期已滿疏內開

督江知縣姚林集崇禎元年十一月內

餉院錢士貴職崇元年加派未完在

督催又于二年閏四月內覆餉院錢士

貴歲崇元年加派未完降職二級戴罪

督催俱于二年十月內准福建布政司

咨呈本部于乞准申詳遵例開復疏內

開復訖

同安知縣曹履泰崇禎元年十一月內覆
餉院錢士貴截叅元年遼餉未完住俸
督催二年七月內准餉院錢士貴手本
本部於直摘遼餉完欠疏內開復訖

興化知縣王績燦崇禎三年二月內覆餉
院沈猶龍截叅二年加派未完住俸無
職名三年七月內准餉院沈猶龍手本
於遼餉告匱疏內開復訖

饒平知縣戈尚友崇禎元年十一月內覆

餉院錢士貴截叅元年加派未完住俸
督催二年七月內本部准總督王尊德
咨於榆關軍需愈急疏內開復訖

零陵知縣符應乾崇禎二年四月內本部
覆巡視太倉科院查叅七年京邊未完
十分革職爲民三年四月內准湖廣撫
院洪如鍾咨稱全完本年六月內開復
訖

福清知縣周堪賡崇禎元年十一月內覆

餉院錢士貴截叅本年加派未完住俸
督催四年三月內准餉院吳煥手本於
遼餉徵解已完疏內開復訖

海澄知縣余應桂崇禎元年十一月內覆
餉院錢士貴截叅本年加派未完住俸
督催四年三月內准餉院吳煥手本於
遼餉徵解已完疏內開復訖

莆田知縣吳彥芳崇禎元年十一月內覆
餉院錢士貴截叅本年加派未完住俸

督催又三年六月內覆餉院沈猶龍歲
叅二年加派未完降俸二級戴罪督徵
俱于四年三月內准餉院吳煥手本於
遼餉徵解已完疏內開復訖

金華知縣高倬崇禎三年二月內覆餉院
沈猶龍載叅二年加派未完住俸督徵
四年三月內准巡撫陸完學咨於遼餉
徵解已完疏內開復訖三年四月內本
部覆巡視太倉科院查叅元年京邊未

完四分降職二級於本年九月內准浙
江巡撫陸完學咨稱全完於四年二月
內開復訖

長興知縣向鼎崇禎元年五月內本部

覲恭降職二級二年四月內准撫院張延登咨於

國家有急不待時之餉疏內開復訖又於三年二

月內覆餉院沈猶龍截恭二年加派未

完降俸二級戴罪督徵四年三月內准

撫院陸完學咨於遼餉徵解已完疏內

開復訖又崇禎三年三月內總漕李待

問查叅崇禎元年輕賚未完五分以

本部題覆降俸二級三年八月內總漕

具題全完十月內本部具題開復訖

雒陽知縣尹洗崇禎三年四月內本部覆

巡視太倉科院查叅元年京邊未完一

分以上住俸督催四年正月內准河南

巡撫郝土膏咨稱錢糧通完隨於二月

內具題開復訖

臨淄知縣耿胤樓崇禎三年二月內覆餉
院沈猶龍截叅降俸二級戴罪督徵三
年四月內准餉院沈猶龍手本於元年
餉期已滿疏內開復訖又崇禎三年二
月內覆德州倉徐天鳳查叅崇禎元年
京邊未完二分以上降俸二級續准都
察院咨山東巡按高捷呈稱錢糧續解
全完卽於四年二月內遵例查叅逋賦
疏內開復訖

嘉定知縣謝三賓崇禎三年二月內戶科
解學龍題參元年太倉錢糧未完一分
以上住俸四月內本部覆巡視太倉科
院查參元年京邊未完四分以上降職
二級崇禎四年正月內准應天巡撫曹
文衡咨稱錢糧十分通完五月內具題
開復訖

吳江知縣熊開元崇禎三年八月內催餉
京卿王夢尹參本官元二年分新舊餉

未完三分部覆降俸二級四年三月內
該王夢尹報解全完卽於撥餉徵解全
完疏內開復訖又崇禎三年三月內總
漕李待問查叅崇禎元年分輕賚未完
一分本部題覆住俸崇禎四年三月內
續解全完取有實收又准巡撫曹文衡
咨錢糧十分全完卽於考選疏內開復

訖

華亭知縣鄭友玄崇禎三年二月內本部

覆戶科解學龍

聖壽屆期疏查叅元年京邊未完四分降職二級又

于四月內覆巡視太倉科院查叅疏京

邊未完五分降職二級崇禎四年正月

內准應天巡撫曹文衡咨稱通完卽于

五月內開復訖又于崇禎四年二月內

本部查叅前任青蒲縣天啓七年分金

花未完一分以上照例降俸一級續據

該府申稱差官徐一林起解及據商民

代輸銀兩寄庫卽於考選疏內開復
蕭山知縣余敬中崇禎三年二月內本部
覆戶科都給事中解學龍

聖壽屆期等事查叅二年加派未完降俸二級四年
三月內准撫院陸完學咨於遼餉徵解
已完疏內開復訖

臨海知縣萬永康崇禎三年二月內覆餉
院沈猶龍二年加派未完住俸督催四
年三月內准撫院陸完學咨於遼餉徵

解已完疏內開復訖

和門知縣朱大雅崇禎三年四月內本部
覆巡視太倉科院查叅元年京邊未完
一分以上任俸督催四年二月內據本
官呈稱錢糧通完冊庫查覈無異具題
開復訖

湘潭知縣陳文燿崇禎元年二月內覆川
貴總督張鶴鳴查叅天啓六年黔餉未
完一分以上降職一級崇禎四年二月

內在京務解通完卽于考選疏內具題
開復訖

順德知縣黃金貴崇禎四年四月內本部
題爲查核預徵完欠等事查叅降職一
級戴罪督徵四年八月內題爲查明榮
澤免派根因疏內糧完開復訖

東莞知縣李模崇禎四年四月內本部題
爲查核預徵完欠等事查叅降職一級
戴罪督徵四年八月內題爲查明榮澤

免派根因既內糧完開復訖

陽江知縣李右謙崇禎元年十一月內
餉院錢士貴截叅住俸二年七月內准
總督王尊德咨于榆關軍需愈急疏內
開復訖又于崇禎四年四月內本部題
爲查核預徵完欠等事查叅降職一級
戴罪督徵四年八月內題爲查明榮澤
免派根因疏內糧完開復訖

靈山知縣黃學元崇禎元年十一月內

餉院錢士貴截叅元年加派未完任俸
二年七月內准總督王尊德咨於榆關
軍需愈急疏內開復訖又于四年四月
內本部題爲查核預徵完欠等事查叅
降職一級戴罪督徵四年八月內題爲
榮澤免派根因疏內糧完開復訖

榮澤知縣龐杰崇禎四年四月內本部題
爲查核預徵完欠等事查叅降職一級
戴罪督徵四年八月內題爲查明榮澤

免派根因疏內聲說該縣原無加派請
叅題明開豁訖

桐鄉知縣楊兆升崇禎三年三月內總漕
李待問查叅崇禎元年輕費未完一分
本部覆

准住俸三年八月內總漕具題全完十月內本部題
覆開復訖

金壇知縣劉宗祥崇禎二年三月內本部
覆巡視太倉科院查叅七年京邊未完

七分降職二級隨准應天巡撫曹文衡
咨稱全完于七月內開復訖又崇禎三
年三月內總漕查叅天啓六年輕賚未
完二三分本部題覆住俸崇禎三年八
月內總漕具題全完十月內本部具題
開復訖

山陽知縣朱國棟崇禎三年三月內總漕
李待問查叅前任知縣孫肇興接管知
縣朱國棟天啓六年輕賚未完四分以

上本部題覆比照未完二三分例降
二級崇禎三年八月內總漕具題全完
十月內本部題覆開復訖

崇禎四年閏十一月初七日具

題本月十二日奉

聖旨開復宜聽撫按奏請何得但憑咨揭至府申寄
庫本官自呈及考選疏內具題中間豈無隱徇情
弊這本內溷寫開復訖字面亦未見如何奉旨還
再明白開列不許遺漏併各官見任何職具奏其

曾經撫按題明部覆開復奉旨
在考選前者不必
混入欽此

奏爲微臣衰朽多罪人言再及懇祈

天恩蚤賜罷斥以重

國計以全晚節事竊照臣以衰病孱軀久濫計部
深惟綆短汲深大懼覆餗負乘比來無歲不具
疏

請告今年十月內因御史余應桂有言臣又三疏乞
骸荷蒙

聖恩不卽棄捐

俯賜勉留不曰邊計方殷則曰軍儲正急不曰遵
旨卽出則曰宜遵

屢旨論進退之大閑自當亟去揆

君臣之大義未忍恣然良以奴氛方熾誠不敢獨以
憂勞貽

君父也

明綸有赫又不敢輒以徑率負

國恩也犬馬尚知戀主微臣敢求弛擔以故覩顏
復出料理計務今戴星出入者又四十日雖病

困支離終忍死以待今閏十一月初九日早
朝事竣甫出

西長安門、陵覺痰壅嘔逆昏暈移時已而寒熱大作、猶勉強扶掖入署、薄暮回寓、僵仆兩日、尚無起色、忽見即報、則御史余應桂於時事艱危已甚、疏中又指摘及臣矣、所言陳于泰事已經前疏、辯明無容再言、念四郊多壘

國計至重、自揣昏耄已甚、真覺溺職堪羞、臣久自分當去、臺臣亦謂戀不即去、則臣安可、須臾留

也。所以不得不瀝血再鳴祈

恩於

皇上之前。夫人臣之所恃以効職者。才具也。臣自待
舉仕版。垂四十年。僅有一腔樸誠。慙無救時計
謨。邈歲加派。頰仍而民生坐見其困憊。供億煩
夥。而士馬未見其飽騰。既不能開源。又不能節
流。致煩

聖主焦勞

文華召對。深以諸臣不能實心幹濟爲憂。乃幹濟

宜無重於計務者。臣當媿死。顧臣心雖不敢不實。而臣才若已限自

天。是以才具按之而知亟當去也。人臣之所恃以自靖者精力也。臣以踰六望七之年。心血耗盡。無復旺之日。筋力衰盡。無復健之期。二豎已入膏肓。竭蹶不前。精神益復潰亂。錯悞時出。從此智慮日短。一日籌策。亦日踈一日。雖欲勉強支吾。祇恐過有增加。罪難取贖。是以精力度之。而又亟當去也。人臣之所憑以自立於

朝者惟此去就之節止足之義也是必內無
而後外可展布臣自八月以來猥以席藁
之身尚儼然爲農部之長雖蒙

聖恩優容濫黜

朝班而方寸不容自昧衾影未免懷慙卽無人言
已難就列而况誚讓加之又頑鈍嗤之矣尚可
貪位慕祿俾令廉耻掃地乎是以禮義衡之而
又亟當去也辰下奴騎雖遁尚虞再交綢繆桑
土惟此其時

國計持籌豈容少稽

皇上若緩臣一日之罪斥是多臣一日之曠官萬一
貽患封疆重誤軍

國臣不足惜如

國家大事何目今師濟盈廷壯年心計正不乏人
柰何以臣衰病多罪之身妨賢者路臣卽不敢
爲一身慮誠不得不爲

國計慮矣伏望

皇
憐臣衰病原非矯飾

念臣罪戾終難自贖

鑒臣誅贖實招人言

察臣求退總歸血誠墜將臣愚視職罷斥別
簡賢能整頓部務但得邦計有托臣雖身膏
斧鑕無憾也臣自殿可任惶悚待罪之至

崇禎四年閏十一月十二日具

奏本月十五日奉

聖旨計務殷煩卿才猷敏練正資幹濟何乃又有陳
諫着卽出安心任事吏部知道欽此

請官管理事例印務疏

題爲請官管理事例印務事該本部添註右侍郎
崔爾進奏爲微臣親老身病等事崇禎四年閏
十一月初八日奉

聖旨崔爾進佐計勤練覽奏殊屬至情准回籍調理
病痊起用該部知道欽此欽遵隨該右侍郎崔爾
進將原收到管理事例關防

秘書文卷冊籍移送部例應委官帶管查得往例
臣部事例印務向屬右侍郎管理崇禎三年九

月內

皇上念切邊疆慮先軍食特

命左右兩侍郎康新民周士樸分理新舊兩餉事務
一 各有所屬先是崔爾進奉

命以添註右侍郎到部未有專職至是遂請以事例
屬之奉有

欽依今爾進既以病去原係添註例不補官所有事
例印務應歸右侍郎管理但右侍郎周士樸
在專理新餉政務繁劇且查事例掇納之

皆供邊鎮額出之舊餉若爲舊餉用者而復以
專理新餉者握之似屬未便且左侍郎康新民
專理邊餉每費講求莫若卽以事例歸併管理
庶事權不至紛紜而出入更易清查也爲此具

疏上

請恭候

命下臣謹將事例印務移送左侍郎康新民遵奉管
理施行

崇禎四年閏十一月十三日具

題本月十七日奉

聖旨是欽此

衰病不堪邦計再懇 聖慈罷疏

奏爲衰病不堪邦計多罪義難久留再懇

聖慈矜察立

賜罷譴事該臣於閏十一月十二日奏爲微臣衰朽
多罪人言再及懇祈

天恩早賜罷斥以重

國計以全晚節事本月十五日奉

聖旨計務殷煩卿才猷敏練正資幹濟何乃又有陳
請着卽出安心任事吏部知道欽此臣跪捧

明綸感激涕零竊念臣駑鈍已極而尚許以敘秩
既已章而猶望其幹濟既惕以計務殷煩又勉
以安心任事此真

覆載弘慈非臣捐糜頂踵所可報稱萬分一也獨念
人臣之誼無以有已然疾痛之甚必且呼

天臣實有萬難就列之義而敢惜哀鳴於

皇上之前乎臣至愚極陋因緣際會忝竊非據久隘
計務屢疏乞骸未荷

允放罪因病而益增補救無術病因罪而益劇痊可

無日當鍾鳴漏盡之時懷跼天踏地之心是臣
以不去而使骸骨無首丘之望也其當亟去一
也覲顏再出物議交加雖屢荷

聖慈之優容實無道人言之指摘至以不聽臣去歸
咎輔臣是臣以不去而累輔臣有比周之名也
其當亟去二也方今虜未悔禍供億正殷而臣
以駑馬疲牛勉供驅策前此已多溺職之咎後
此愈深負乘之罪是臣以不去而將來之貽患
封疆者更不知所底止也其當亟去三也至於

微臣拊心知疚顧影自憐非特外無以對清議
而實內無以愜獨知則尤中夜撻徨以仰負
聖明爲耻蓋我

皇上神明天縱之主也當

臨御之初年卽孜孜以

國計民生爲首務而

拔擢及臣所期望於臣者良厚矣臣待罪以來四年
於茲其受

皇上恩遇又良久矣奈臣質性旣庸年力復憊旣未

講生財之大道復不請救時之良方今邊儲宜
裕而不能裕俾塞上金錢有捉襟露肘之憂者
臣罪也民瘼宜卹而不能卹俾海內蒼黎有剜
肉醫瘡之苦者臣罪也

皇上振飭臣工

肅法宜從臣始儻蒙

聖慈寬其衰老不加

斧鉞已爲萬幸若臣仍復依回澳滯尸位曠官使
天下萬世謂

皇上有堯舜之資徒以優容一衰殘多罪之臣主前
非人不能致治理於三代是臣以不去而終負
皇上也非獨

皇上之罪人實天下萬世之罪人也此尤臣自揣負
罪已深而與以一去自贖者也伏望

鑒臣苦情亟行罷黜先委左右侍郎署印速

諭廷推

簡用新員資其朝氣

皇上圖治若渴必有救時名世應運而出者言念及

斯而臣之求去固已後矣統惟

皇上廣照逮

賜乾斷施行臣自嚴可任惟懷顧想之至

崇禎四年閏十一月十七日具

奏本月二十日奉

聖旨卿老成勤練邊計方殷正宜悉心籌畫以副委
任何乃屢疏引請還道旨卽出視事毋得再陳
部知道欽此

國計不容重誤 天恩禡斥疏

奏爲

國計不容重誤 罪臣萬難供職 三懇

天恩垂憐 蚤賜禡斥 事 臣於閏十一月十七日奏
爲衰病不堪 那計多罪 義難久留 再懇

聖慈矜察 立賜罷譴 事 本月二十日奉

聖旨 卿老成勤練 邊計方殷 正宜悉心籌畫 以副委
任何乃屢疏引請 還遵旨卽出視事 母得再陳 該
部知道 欽此 竊念 臣待罪度支 汲深綆短 僭冒 尤日

積衰病日深邊計方殷嗟籌畫之無策恐健
效豈勤練之足稱猥荷

聖明獎詔勉留

浩蕩深恩隕首莫報臣非木石何敢怱然必去瀆聒
天聽惟是今日任最大而責最重者無踰計務而臣

冒昧肩任已四年矣臣幼讀書至大學之末章
論平天下而惓惓於理財一事儒者以爲末務
而在今日則本計也臣徒能讀聖賢之書而不
能推明其理以致之用所謂生衆食寡爲疾用

舒者臣迄今思之茫然未得要領也卽今屯田
鹽法鼓鑄等項皆理財窳會臣殫力圖之渺焉
未收寸効也三空自如一籌莫展捉襟而露肘
恒苦挹注之艱膠柱以調絃難逃交偏之謫臣
雖勉拮据矢心清謹而終無裨益於軍

國之大計究竟一庸衆人耳天下之大豈其少一
庸衆人而久居高位計務之重豈堪付一庸衆
人而猥令曠厥

皇上試數九列中有尸位最久如臣者平有奉職無

狀如臣者乎、加以頽憊已甚、昏聩轉增、常恐伺
馬顛眩、早填溝壑、未病尚難撐持、已病何堪
理、且御史余應桂已再疏抨彈、及臣卽輔臣、
延儒亦以臣不副委任、引爲已罪矣、臣捫心循
省、媿汗交流、因念從來帝王治世、固重責臣下
以事功、而尤厚繩臣下以廉耻、卽如久任一法
原用以督課責成、非欲姑容不肖也、臣部職掌
天下財賦、內徵輸郡國、外供億九邊、一切督撫
臺省章疏、多下臣部題覆、斟酌衡量、以歸於當

臣以衰病之軀屢掛人言物望愈輕頑鈍貽譏
何以稱喉舌之司持出入之平而得免於擲檢
乎其有褻

國體也多矣臣抱病待臯倏已半月一切繁急政
務間於卧榻了之然司屬未免懈弛案牘未免
塵閣豈其前所終日屹屹而不足者今乃高卧
爲理而有餘哉言念及此芒負在躬若罷譴再
遲一日則曠蹶更多一日必俟叢脞已極而後
治臣之罪雖萬死不足贖矣瀝膽哀鳴一字一

血惟

蚤褫斥、少道舉辜、或謂撫賞一事屢奉

明旨切責、見在清覈、臣今求去、似涉規避、臣願乞

恩革職聽勘、暫棲旅舍、俟查覈後果有朦發分肥等

弊、臣願甘伏

斧鉞之誅、萬一得免於戾、而後放歸田里、未晚也

總期目前無誤

國計末路少存廉耻、則萬幸矣、臣自嚴可勝哀願

祈禱之至

崇禎四年閏十一月二十四日具

奏本月二十七日奉

聖旨前有旨諭卿卽出何乃又有此奏國計甚重大
臣當祇遵君命力圖幹濟何得以私情屢請工部
知道欽此

回奏撫賞錢糧文冊疏

奏爲遵

旨備查市賞事崇禎四年閏十一月十九日戶科抄
出該監視大同糧餉兵馬邊墻撫賞等事御馬
監太監劉文忠題前事本月十八日奉

聖旨該鎮撫賞錢糧旣稱戶兵兩部各有報冊前時
屢訊不肯說出明是部隱衛狗都着自行回奏其
歷年紅簿見在何處劉文忠速行追取與該撫會
查明白併經管職名具奏如有隱毀情弊職官叅

來重處吏書人等嚴拿究問餉司奏報事情知道
了該衙門知道欽此欽遵抄出到部臣等捧

明綸跋踏無地臣雖不才荷蒙

四朝豢養祇矢一念勿欺近以衰病日深屢乞

放斥然所不克供職者力也所不敢不矢竭者心也
硜硜之性至死不移竊有遭逢

明主受

國厚恩敢少涉於欺隱以自了

斧鑕哉查冊籍一事向來錢糧文冊投部例發各

司收查緣該司官吏書胥更代不常勤惰亦異
臣自到任以來屢經申飭加意收藏但自萬曆
四十一年起至崇禎三年止閱歲已久閱人已
多其有無收存脫漏則亦非臣愚所能逆遡者
也前錦衣衛臣劉僑奉

旨移取科抄揭帖鞫問臣隨簡查三鎮餉賞總數則
有督撫節年

奏繳科抄十一件及揭帖投送臣部者亦十一件
俱爲錢糧百分缺乏等事中間管收除在餉賞

項款各存其槩亦尚有掛漏未全者已經核
該衛查閱矣又督令書胥簡出三鎮餉司節筆
造到月報季報俱屬年例錢糧文冊爲數頗多
尚未全備此卽大同餉司所稱按期造報者蓋
專爲主客兵餉而設也至于撫賞市買原係兵
部職掌從來督撫

奏繳撫賞科抄大率俱落兵部故臣部亦未知三
鎮

奏繳止于何年如前督臣王象乾更定撫賞科抄

止下兵部而臣部并未與知者是也近又查得
兵部存有宣撫沈祭科抄崇禎四年正月內奏
爲互市撫賞事二月初二日奉

聖旨據奏天啓三年分該鎮市賞銀兩支用節省數
目該部查核具奏其歷年未完文冊卽行償造進
覽欽此查疏內稱撫賞應挨年

奏繳因萬億庫應發市本馬價屢多壓欠難以開
銷必俟發足方行

奏繳後餉庫日訕終難取盈以致連壓數年自郭

之琮以後俱未

奏繳是宣府一鎮自天啓三年後以至於今

奏繳未到此其明徵也查該鎮天啓三年撫賞冊

一本見存臣部而以前茫無可考其大同山西

撫賞冊並無收存近於本年閏十一月內始據

宣撫移送崇禎三年分撫賞冊一本晉撫移送

四十一年起至崇禎三年止撫賞冊一本并無

奏繳字樣此則行文稽查之後始行造送者也此

外惟有崇禎三年十二月內宣大巡按胡良機

移送宣大二鎮閱視八事簡明冊二本內開天
啓七年至崇禎二年止一應收支錢糧數目而
撫賞錢糧亦在其內此亦可以備查互質特非
科臣所謂細數內臣所謂底冊者也但雲撫既
稱見有

奏繳底冊定非無稽之言非係彼中差來人役別
有停閣卽係該司書胥收受竟致散逸臣部見
今勒令簡查其有無尚屬難定且旣經

奏繳則投送賞冊必不止臣部一處如別衙門有

收存者自可互觀而並論矣總之文冊浩繁
典守未必其謹嚴事務冗繁而旁觀易至於
失是則經承書胥自無所逃於疎玩之罪而
部歷來堂司不能簡點覺察亦無所辭咎也仰
丐

聖慈曲垂原宥仍將簡出前項所存科抄揭帖及月
報季報等冊并撫賞冊四種並送內臣科臣一
體查覈具奏

定奪弟各鎮撫賞銀兩除兵部另發外其出之臣部

原缺

擬實查奏撫賞文冊疏

奏爲遵

旨據實查奏撫賞文冊事崇禎四年閏十一月二十四日該臣奏爲遵

旨備查市賞事二十七日奉

聖旨撫賞具冊報部昨督撫回奏甚明這本內一味游移支飾豈大臣飭屬釐奸之誼還着嚴查據實速奏該司官併着回將話來欽此臣聞

命冰兢隕越無地夫撫賞文冊旣經督撫投部而復

致有遺失責臣以不能飭屬釐奸臣何敢辭若夫游移支飾罪涉欺罔臣萬萬不敢出此先是科臣朱又煥等查核餉賞錢糧具疏內稱雖各年有

奏繳之例套玩已久冊籍無存等語奉

旨經手書役錦衣衛拿去研鞠毀失冊籍情繇具奏
臣隨查有督撫節年

奏繳科抄并投送揭帖各十二件俱三鎮餉賞
數卽移送錦衣衛查閱訖又查有宣撫



原缺

者又雲撫張宗衡

奏繳萬曆四十五年起至天啓七年撫賞冊二本
乃係崇禎三年十二月賚到者又宣大總督馮
嘉會

奏繳天啓四年撫賞揭帖一本乃係天啓五年六
月賚到者又宣大總督張樸

奏繳天啓六年撫賞冊一本乃係天啓七年七月
賚到者又宣大總督張曉

奏繳天啓七年撫賞冊一本乃係崇禎元年七月

賚到者又據山東司簡出宜府口北道開送額
咸淳等崇禎元二三年宜鎮撫賞冊二本乃係
崇禎四年十一月賚到者計見存者前後簡出
共十七本除口北道造送二冊外餘皆督撫等
冊前兵部疏開投該部者內有總兵冊一本道
府冊十五本此皆從來不投臣部者又似未可
緊論緣

奏繳冊紙數無多書役又多扯去殼面以此混入
文卷之中益難簡出近始以翻案細搜得之亦

尚未全非前實匿而今始出也且前項

奏繳冊止具管收除在總數如大同撫賞冊二本
包括十一年撫賞之事然一冊僅十葉一冊僅
六葉寥寥大槩並無支銷細數此固存之祇足
備

奏繳之名而核之不足供摘發之實者矣頃宜撫
移臣部咨云院道所存

奏繳底冊僅管收除在總數未能如廳冊之詳此
其明徵也臣部非惟不敢隱飾亦無所用其隱

飾矣况撫賞一案自奉

明旨後內外諸臣悉心查覈庶幾水落石出臣方精其釐剔少道朦狗顧敢隱匿支飾以爲藏奸宿蠹之地耶總之撫賞各有司存而

奏繳動歷年所因報用僅存大綱而書胥視爲故事年近猶獲收存歲久遂至散佚

明旨着臣速奏併令司官回話第自萬曆四十一年起以至今日司官幾經更代且收用之人未必卽失用之人逆遯疎虞猶難懸斷若郎中

玄自本年五月受事任內文冊全備無遺且又簡出以前文冊况其拮据邊餉量入計出頗効微勞仰祈

聖明俯賜矜原及於寬政惟是冊籍收藏原屬書胥本役如沈應聘王大儒胡士安俱各分管宣大山西三鎮冊籍今俱見羈錦衣獄中雖無隱匿之情難免疎惰之罪繩以三尺其何追焉若臣自嚴本以衰朽昏聩之身夙多溺職繆官之咎先後收存文冊不能保無滲漏凜

明綸之有赫惟東躬而待罪所異

聖恩寬假特貸一死姑從三褫以爲任使不効者之

戒此則

皇上浩蕩之恩而非臣愚所敢必也臣自嚴可勝惶

悚戰慄之至

崇禎四年十二月初四日具

奏本月初十日奉

聖旨據查撫賞文冊殘缺尚多內如張宗衡宋統殷
二冊或十一年或十八年始一彙報是何緣故都

着自行奏明宜鎮今歲五月報冊如何稱於懷案
中簡出又十一月口北道開造二冊乃因顧咸寧
等侵冒行查何得濶抵歲報冊數沈應聘等既分
管三鎮冊籍先時屢訊不吐如何尚云情無隱匿
該部主計籌國還着嚴查詳數盡釐夙弊不得曲
庇屬胥但以求去塞責見存冊本着送總理及該
科磨勘該衙門知道欽此

初估宜鎮撫賞貨物疏

題爲有司欺謬足徵清理難容無說謹據實

上聞伏祈

聖鑒事戶科抄出監視宜鎮御馬監太監王坤題前
事崇禎四年閏十一月二十一日奉

聖旨據奏漏冊挿入等銀侵那情弊顯然至藏匿紅
簿希圖溷冒殊可痛恨萬國孳等已有旨革職着
卽會同該撫提究嚴追如以前紅簿果係經管官
攜去通查職名速奏附進賞物着該部科看議來

說該衙門知道欽此欽遵抄出到部除卽移咨

視宜撫將漏冊挿入藏匿紅簿等情會同提憲
嚴追外其附進貨物宜會估定價該臣等卽遵

旨會同樞臣熊明遇宋槃楊一鵬科臣玄默朱又煥

汪始亨黃紹杰于本月二十七日齊集中府將

宜鎮賞物公同看估議估蟒段一疋原價八兩

五錢今估價六兩白綾一疋原價九錢今估價

五錢紅絹一疋原價四錢七分今估價二錢樣

段一疋原價八錢今估價五錢貂鼠一箇原價

一兩二錢今估價六錢鼠皮一件原價九錢九
分六釐今估價三錢中段一疋原價四錢今估
價三錢又紙包一封內金一塊重三錢六分每
兩三兩五錢換今估無異金葉一張七換今估
無異二號珍珠六十九顆每兩三兩九錢換今
估無異三號珠一百零八顆內有珊瑚一釐每
兩二兩九錢換今估無異銀一錠五兩足色半
錠二兩一錢九二成色又一錠二兩足色又半
錠一兩九二成色除銀兩通等九八外其段疋

等項俱從新置估筭故定價若干若就現在概
惡似並今估亦不值也金珠原價不多時價稍
增今亦只照原價耳案查崇禎三年八月內該
臣部題覆宜鎮商人汪應乾虛冒物價事情內
稱從來收買撫賞多爲貪婪委官侵沒之地其
差原繇請托而得其貨亦多濫竽不堪夫撫賞
之地貨物不召而自來若塞上之所有只宜臨
時平價收買佳物猶勝於先時高價而收買低
貨也卽萬不容已者收買必用正途委用不緣

干請買貨到者俱令該道親估必求價值相當
方許收用有不堪者卽行退出督撫間亦抽磨
一二以防欺蔽有市恩濫收者許撫夷總兵臨
時從公簡舉該道亦難辭責等因本月二十五

日奉

聖旨朝廷撫賞貢夷須使霑被實惠乃積奸商委負
緣侵冒率以紕惡充數該管官亦多濫收市恩以
致外失夷心內喪國體釀害非小汪應乾等所買
物料爾部旣難懸斷着各該督撫道驗估具奏以

後務盡絕干請或和買或委買必取精好該道親
驗估收督撫亦行抽驗如有不堪經管官一併參
處欽此已經移文申飭崇禎四年八月內又經戶
科掄恭勒令自行回

奏去後煌煌

明旨炳若日星收買估驗宜遵成法不謂猶有濫惡
高擡如今茲賞物之甚者也此貨原係何人收
買何官估收盡法重懲追賠物價寧顧問哉既
經會估明白相應具題合候

命下移文宣大總督及宣府撫臣遵奉查究回

奏施行

崇禎四年十二月初五日具

題本月初十日奉

聖旨撫賞貨物冒濫啓業積弊可恨前有旨嚴飭甚
明督撫鎮道各官如何藐玩不遵全無查驗以致
濫惡至此顯係通同朦朧都着回將話來仍着會
同監視詳查何人置買何官估收經管職名一一
開明來着其見估貨物價數該部科既稱朽惡不

值何又浮筭還着另估確議具奏欽此

再查考選開復官員顛末疏

題爲遵

旨再查考選各官叅罰開復顛末事戶科抄出該臣
部題爲遵

旨據實備查先今考選各官歷年叅罰開復緣繇仰
祈

聖鑒事崇禎四年閏十一月十二日奉

聖旨開復宜聽撫按奏請何得但憑咨揭至府申寄
庫本官自呈及考選疏內具題中間豈無隱徇情

獎這本內混寫開復字面亦未見如何奉旨還用
明白開列不許遺漏并各官見任何職具奏其會
經撫按題明部覆開復奉旨任在考選前者不必混
入欽此竊照

國計宜充人才可惜緩於催科者原有降住之條
而勉爲續完者幸有開復之例所以鼓舞新圖
而爭思被濯者用此道也幸臣部從來舊例一
切開復止以錢糧完納爲主雖府縣公移申請
皆得爲覈實昭雪臣自履任深懼司屬曲徇實

緣倖脫必須撫按咨到方爲行查開復惟速餉以餉院爲主揭卽其咨若錢糧未完者雖經撫按移文猶須駁查弗敢開也綜覈之道至此似無遺術考選之時臣部亦用此法如謂必俟撫按奏

請而後代爲開復固是畫一之政但自今年十月以前

國家原未懸此

功令臣部原未頒此規例臣實愚昧不能臆爲創

而峻爲繩也先今考選諸臣臣部前奉

明旨一切叅罰開復緣繇業已臚列前疏盖有完糧
已久而開復亦久者有完糧雖久而近始開復
者亦有一二入

覲之時尚未全完後始補解清楚而臨期開復者但
錢糧完納實已到庫開復原疏見在

御前臣部未敢絲毫隱徇其間茲奉

聖旨撫按題明部覆開復者不必混入查撫按題明
者有郭必昌等五人又臣部誤於者有黃金貴

等五人俱無容再贅而中間有別案叅罰開復者又不敢獨遺通計開復考選各官尚有鄭之尹等二十五人臣謹再查叅罰緣繇并見任何職及原奉開復

明旨月日備列疏後不敢一字增飾總之

明旨所謂開復在考選前者一言足以蔽之要難逃皇上之洞鑒也又有

明旨所摘府申寄庫本官自呈及考選疏內具題者不敢不據實剖陳查本官自呈者則有原任和

門縣知縣今考選南京大理寺評事朱大雅李
官崇禎元年京邊未完一分以上臣部於崇禎
三年四月內覆巡視太倉科院疏住俸督催本
年六月內解部通完至四年二月內入

覲留部祇以在京無從得撫按咨徑自具呈臣部查
錢糧已完隨於二月內具題開復誠不忍其獨
抱向隅之泣耳若考選疏內具題開復者則有
原任吳江縣知縣今考選吏科給事中熊開元
本官先經京卿王夢尹叅罰已另疏開復惟

禎元年輕賞未完一分臣部題覆總漕疏住俸
迨崇禎三年三月內續解銀一千五百六十二
兩全完訖前臣考選疏稱本官補解通完照數
收明當在開復留部之列則所云開復者非無
據也又有原任湘潭縣知縣今考選戶部主事
陳文耀別無叅罰止有天啓六年贖餉未完一
分以上臣部覆川貴總督疏降職一級迨崇禎
四年二月內湘潭在京鄉紳原任禮部尚書李
騰芳等具呈臣部代輸銀七百八十三兩一錢

三分黔餉通完故臣亦於考選疏內開復又有
原任華亭縣知縣後考選雲南道御史鄭友奎
曾經戶科及太倉科院叅罰已另疏開復惟前
任青浦縣天啓七年金花未完一分以上降俸
一級續據松江商民李日新等具呈臣部代輸
銀二千九十三兩暫寄太倉庫內聽候解官至
日恭

進又據該府申稱差官徐一林起解金花一千五
百兩原數已足故臣亦於考選疏內開復前臣

考選疏稱「二臣士民之在長安者崇蔭新被德政難忘俱願照數赴部樂輸順人情之便濟

國儲之急則所謂開復者非無因也查熊開元陳文耀銀項俱已收庫支銷獨鄭友玄原銀猶在寄庫該府解銀臣部移文屢催未到尚非完局而本官亦已聽降矣總緣奉有順資續解酌量分數開復陞考之

旨故臣部奉行惟謹耳夫錢糧未完而冒爲開復是謂隱狗錢糧已完而代請開復正以遵

旨若非祗奉

天語而臣部敢以冒昧冥行也哉先考諸臣幸際
清時仰荷

聖明甄錄業已奮跡風雲播維嗜之響依光

日月騰謗之聲似難再有吹求別有催折所望
特賜優容各守故步則已出之

王言不至反汗而同登之才俊咸慶彈冠矣至續考
諸臣均當澄汰之餘原無錢糧掛碍中有京職
司理并未經手錢糧一繫候

命日久未免積薪自憐尤當沛發

新綸亟令就列毋使人謂錢糧已完徒以臣德薄言輕波累賢豪無已時也統望

天慈廣覆以信前後考選之

旨寧獨諸臣感恩圖報卽海內循良之吏當從此益加策勵矣臣等可勝惶悚顙望之至

計開

直隸丹徒縣知縣今考選南京吏部文選司主事鄭之尹崇禎二年四月內本部覆巡

視太倉科院查叅天啓七年京邊未完
分降職二級本年七月內准應天巡撫曹
文衡咨稱全完該本部題爲遵例查叅通
賦等事開復本月二十三日奉

聖旨是欽此

直隸金壇縣知縣今考選江西道御史劉宗
祥崇禎二年四月內本部覆巡視太倉科
院查叅七年京邊未完七分降職二級本
年七月內准應天巡撫曹文衡咨稱全完

該本部題爲遵例查叅違賦等事開復本月二十三日奉

聖旨是欽此

陝西長安縣知縣今考選候補北科孫三傑
崇禎元年十一月內本部覆餉院錢士貴
截叅元年加派未完住俸督催二年七月
內准撫院劉廣生咨該本部題爲直摘違
餉完欠之尤等事開復本月十一日奉

聖旨是欽此

福建同安縣知縣今考選吏科給事中曹履
泰崇禎元年十一月內本部覆餉院錢士
貴截參元年加派未完住俸督催二年七
月內准餉院錢士貴手本全完該本部題
爲直摘遺餉完欠之尤等事開復本月十
一日奉

聖旨是欽此

福建晉江縣知縣今考選江西道御史姚孫
渠崇禎元年十一月內本部覆餉院錢士



原缺

二年六月內准總督王尊德咨報通完該
本部題爲榆關軍需愈急等事開復七月
初五日奉

聖旨布政司總轄錢糧若肯那緩就急邊餉何憂不
充陸問禮元二年遼餉那解俱完准紀錄以勵急
公未完州縣仍着住俸督徵該衙門知道欽此

廣東饒平縣知縣今考選刑部山西司主事
戈尚友崇禎元年十一月內本部覆餉院
錢士貴截叅元年加派未完住俸督催二

年六月內准總督王尊德咨稱全完該本部題爲榆關軍需愈急等事開復本月初五日奉

聖旨布政司總轄錢糧若肯那緩就急邊餉何憂不充陸問禮元二年遼餉那解俱完准紀錄以勵急公未完州縣仍着任俸督徵該衙門知道欽此

直隸江都縣知縣今考選廣東道御史遲大成崇禎三年二月內本部覆餉院沈猶龍截叅二年加派未完任俸無職名三年五

月內准餉院沈猶龍手本全完該本部題
爲元年餉期已滿等事開復本月二十日
奉

聖旨是欽此

直隸興化縣知縣今考選福建道御史王績
察崇禎三年二月內本部覆餉院沈猶龍
截叅二年加派未完任俸無職名三年七
月內准餉院沈猶龍手本全完該本部題
爲遼餉告匱等事開復本月二十九日奉

聖旨是欽此

湖廣零陵縣知縣今考選江西南康府同知
符應乾崇禎二年四月內本部覆巡視太
倉科院查叅七年京邊未完十分革職爲
民三年四月內准湖廣撫院洪如鍾咨稱
全完本年六月內該本部題爲遵例查叅
逋賦等事開復本月初五日奉

聖旨逋糧旣已全完原叅降革住俸等官俱准開復
該部知道欽此

福建福清縣知縣今考選陝西道御史周堪
虞崇禎元年十一月內本部覆餉院錢士
貴截叅本年加派未完任俸四年三月內
准餉院吳煥手本全完該本部題爲遵餉
徵解已完等事開復本月二十六日奉

聖旨是欽此

福建海澄縣知縣今考選陝西道御史余應
桂崇禎元年十一月內本部覆餉院錢士
貴截叅元年加派未完任俸四年三月內

准餉院吳煥手本全完該本部題爲遼餉
徵解已完等事開復本月二十六日奉

聖旨是欽此

福建莆田縣知縣今考選四川道御史吳彥
芳崇禎元年十一月內本部覆餉院錢士
貴截叅本年加派未完任俸又三年六月
內覆餉院沈猶龍歲叅二年加派未完降
俸二級戴罪督徵俱于四年三月內准餉
院吳煥手本全完該本部題爲遼餉徵解

已完等事開復本月二十六日奉

聖旨是欽此

浙江金華縣知縣今考選河南道御史高傳
崇禎三年二月內本部覆餉院沈猶龍截
叅二年加派未完住俸四年三月內准巡
撫陸完學咨報全完該本部題爲遼餉徵
解已完等事開復本月二十六日奉

聖旨是欽此又崇禎三年四月內本部覆巡視太倉
科院查叅元年京邊未完四分降職二級

本年九月內准浙江巡撫陸完學咨報全
完四年三月內該本部題爲遵例查叅連
賦等事開復本月十八日奉

聖旨是欽此

浙江長興縣知縣今考選南京兵部武選司
主事向鼎崇禎元年五月內本部新餉

覲叅降職二級二年四月內准撫院張延登咨稱全
完該本部題爲

國家有急不待時之餉等事開復本月十一日奉

聖旨是欽此又崇禎三年二月內本部覆餉院沈猶龍截叅二年加派未完降俸二級四年三月內准撫院陸完學咨稱全完該本部題爲遠餉徵解已完等事開復本月二十六日奉

聖旨是欽此

河南洛陽縣知縣今考選刑科給事中尹洗崇禎三年四月內本部覆巡視太倉科院查叅元年京邊未完一分以上住俸四年

正月內准河南巡撫郝土膏咨稱通完本年三月內該本部題爲遵例查叅通賊等事開復三月十八日奉

聖旨是欽此

山東臨淄縣知縣今考選兵部職方司主事耿胤樓崇禎三年二月內本部覆餉院沈猶龍截叅二年加派未完降俸二級三年四月內准餉院沈猶龍手本全完該本部題爲元年餉期已滿等事開復本月初五

日奉

聖旨是欽此又崇禎三年二月內覆德州會徐天選
查恭元年京邊未完二分以上降俸二級
續准都察院咨山東巡按高捷呈稱瀕解
全完四年三月內該本部題爲遵例查參
通賦等事開復本月十八日奉

聖旨是欽此

蕭山縣知縣今考選南京西城兵馬指揮余
敬中崇禎三年二月內本部覆戶科

聖壽屆期疏查叅二年加派未完降俸二級四年三
月內准撫院陸完學咨報全完該本部題
爲遼餉徵解已完等事開復本月二十六
日奉

聖旨是欽此

浙江臨海縣知縣今考選兵部武庫司主事
萬末康崇禎三年二月內本部覆餉院沈
猶龍查叅二年加派未完住俸四年三月
內准撫院陸完學咨報全完該本部題爲

遼餉徵解已完等事開復本月二十六日
奉

聖旨是欽此

直隸嘉定縣知縣今考選陝西道御史謝三
賓崇禎三年二月內本部覆戶科查叅元
年太倉漕折錢糧未完一分以上住俸本
年四月內又覆巡視太倉科院查叅元年
京邊未完四分以上降職二級三年九月
內該巡漕御史龔一程題爲漕銀徵解太

緩等事全完開復本月初四日奉

聖旨這已完各官姑免降俸住俸未完的該部分別
議處欽此又四年正月內准應天巡撫曹文衡咨
稱通完本年五月內本部題爲遵例查叅
逋賦等事開復本月初六日奉

聖旨是欽此

直隸祁門縣知縣今考選南京大理寺評事
朱大雅崇禎三年四月內本部覆巡視太
倉科院查叅元年京邊未完一分以上住

俸四年二月內本官呈稱京邊錢糧通完
冊庫查覈無異本年三月內該本部題爲
遵例查叅通賦等事開復本月十八日奉
聖旨是欽此

直隸吳江縣知縣今考選吏科給事中熊開
元崇禎三年八月內催餉京卿王夢尹查
叅本官元年新舊未完三分部覆降俸二
級四年三月內該王夢尹報解全完該本
部題爲遠餉徵解已完等事開復本月二

十六日奉

聖旨是欽此又崇禎三年三月內總漕李待問查奏
元年輕齋未完一分部覆住俸崇禎四年
三月內續解全完取有實收又准巡撫曹
文衡咨錢糧十分全完本年四月內卽於
考選疏內具題開復本月初四日奉

聖旨本內錢糧完欠各官分別明悉知道了推官方
志翰等知縣朱賢等俱准一體行取考選

欽此

直隸華亭縣知縣續考選雲南道御史今聽

降鄭友玄崇禎三年二月內本部覆戶科

聖壽屆期疏查叅元年京邊未完四分降職二級又

四月內覆巡視太倉科院查叅疏京邊未

完五分降職二級四年正月內准應天巡

撫曹文衡咨稱通完該本部于五月內題

爲遵例查叅逋賦等事開復本月初六日

奉

聖旨是欽此又本部查叅前任青浦縣天啓七年金

花未完一分以上照例降俸一級續據該
府申稱差官徐一林起解銀一千五百兩
及據商民代輸銀二千九十三兩寄庫本
年四月內卽於考選疏內具題開復本月
初四日奉

聖旨本內完欠各官分別明悉知道了推官方之翰
等知縣宋賢等俱准一體行取考選欽此

湖廣湘潭縣知縣今考選戶部江西司主事

陳文燿崇禎元年二月內本部覆川貴總

督張鶴鳴查叅天啓六年黔餉未完一分
以上降職一級崇禎四年二月內在京補
解七百八十三兩一錢三分通完訖四月
內本部卽於考選疏內具題開復本月初
四日奉

聖旨本內完欠各官分別明悉知道了推官方之翰
等知縣宋賢等俱准一體行取考選欽此

崇禎四年十二月十三日具

題本月二十六日奉

聖旨錢糧叅罰各官平昔無急公之心臨考蹂躪
旨着該部查明不許隱漏如何依然違徇止以部
寺屬官搪抵還着據實詳查具奏本內侍郎何不
列名顯屬瞻諉姑不究欽此

再估宜鎮撫賞貨物疏

題爲有司欺謬足徵清理難容無說謹據實

上聞伏祈

聖鑒事崇禎四年十二月十一日該戶科抄出該本部等衙門題覆監視宜鎮御馬監太監王坤附進賞物公會估價值緣繇十二月初十日奉聖旨撫賞貨物冒濫啓釁積弊可恨前有旨嚴飭甚明督撫鎮道各官如何藐玩不遵全無查驗以致濫惡至此顯係通同朦徇都着回將話來仍着會

同監視詳查何人置買何官估收經管職名一一
開明來看其見估貨物價數該部科既稱朽惡不
值何又浮筭還着另估確議具奏欽此欽遵抄出
到部除移咨監視督撫詳查置買估收各經管

職名回

奏去後隨該臣等復移會兵部及戶兵兩科再行
酌議估計價值其應減不應減緣繇仍各出一
議單過部以便會奏希勿延緩本月十四日准
戶科都給事中玄默手本內稱撫賞所以馭夷

也馴彼桀鶩之氣就我縑緞之中彼利我之金帛珠韋罔或生心必我弗給以廣雜麓猶足彰恩信此表餌遺意也自經營非其人而貨物多倍價自潤故不窮冒蠹之情無以正貪饕之罪然不究原初所值亦難以服當事之心前所會佑蓋評其初買時價值止計其本質之粗惡已少室而不倫再及其積久而朽敝更折閱而當

減今

明旨云旣稱朽惡不值何又浮筭似宜據現前所值

併其惡且朽者估之不得不更爲議減仰祈
聖裁也又於本月十八日准戶科給事中朱又煥
奉
本內稱估價之事其段綾等項須先分絲麻之
辨次論染色之別又問織金之價或應秤重或
應量尺然後以精粗美惡輕重長短定其價值
如此則回

奏方有的據足以取信於

君父又當從新置之時估之乃可便于奉行也各等
因到部又該臣等隨卽遵

旨復會同兵部酌量議明著戶科都給事中玄默具
科都給事汪始事於本月十九日齊集

東朝房將宣鎮賞物行崇文門監督喚集牙行人
等逐一再行估計隨公同覆估得蟒段一疋顏
色尚鮮原價八兩五錢前估六兩今再四審視
與前估無異又稱牙行估稱新時此價尚買不
出白綾一疋秤絲重七兩五錢原價九錢前估
五錢今估實價四錢據稱新值六錢紅絹一疋
秤絲重三兩原價四錢七分前估二錢今估實

值一錢五分據將新值三錢樣段一疋秤
十二兩原價八錢前估五錢今估實值四錢
稱新值六錢中段一疋秤樣重八兩原價四錢
前估三錢今估實值二錢五分據將新值四錢
貂鼠一個原價一兩二錢前估六錢今估破碎
補奏實值四錢若新整者可值一兩二錢鼠皮
一件卽係水獺原價九錢九分六釐前估三錢
今估實值二錢五分據將上好新者可值七錢
又緞包一封內金一塊重三錢六分每兩三

五錢換金葉一張七換二號珍珠六十九顆每
兩三兩九錢換三號珠一百零八顆內有珊瑚
一釐每兩二兩九錢換俱係前估定者今估與
前無異銀一錠五兩足色半錠二兩一錢九二
成色又一錠二兩足色又半錠一兩九二成色
除銀兩通算九八并與前估無異外其段尺等
項臣等參訂公議先較量絲料次斟酌工價又
復分別新舊逐項確擬務期稱物此番權衡似
亦足以錮冒破之奸而并可以服商委之心矣

第撫賞貨物耗溢已非一朝今

皇上徹底清釐嚴虛糜于邊委正欲頒實惠于各處
假使物取其精值當其質原不妨豐之以示恩
豈徒令減之以省費臣等仰體

聖明撫夷剔蠹之深意而公平度之倘所減者而矯
枉太過使後來承買者不以核實爲功而反以
減價藉口值太低則貨必惡以此而充賞具反
爲厲階又臣等之所大恐也至細閱段疋諸貨
色淫而質陳積貯幾歷年所卽欲追賠又難執

今茲以爲例者况從前收買原非一人則貨物之美惡高下又豈能盡比而同之乎今欲盡法繩貪懲前毖後在

聖明自有獨裁非臣等愚昧所能窺測萬一也臣等草疏已畢于本月二十二日又接宣撫沈啓咨前事內稱監視所進不堪買貨蓋在城同知庫節年所儲其貨皆委官買辦弊全在營差領銀之日蓋營差囑托領銀扣除皆取償于不堪之貨除回

奏候

旨外第欲查經管職名須將貨物查其字號蓋庫積
六十年來美惡新陳配給其敗繪朽革終沉庫
底或編號在箱或記識在貨懸揣難憑須發監
視原呈不堪貨物比對字號查買收之官詰其
營差領銀與驗收衙門有無情弊及經管職名
據實

上聞或貨不便發出徑查貨物原留記號一一咨示
庶查理有據而追究無詞等因到部臣等細閱

容錄賞物之不其皆管者之爲榮臣部崇禎三
年八月內題覆官商汪應乾虛冒物價疏中收
買必用正途委用不緣干請議亦正慮及此今
撫臣固已盡搜其積弊之源矣臣等方慮朽物
收買多年追究似難懸坐今據咨云箱有編號
負有記識自此推求當得源委從前侵耗者既
無脆漏之奸見在經管者亦無代累之苦法行
兩情平一懲而自善者有年是第貨物中所留
半數員等銀不能取贖且并有磨段無記者合

將監視原進月物照數令該撫領出到部查覈
明白具科具

奏創慈惠賸情極其詳而功過攸分矣臣等未
敢擅便恭候

命下一體遵奉施行

崇禎四年十二月二十五日具

題崇禎五年正月初六日奉

聖旨這撫賞綾段等項徒有空名通不濟用賞不見
惠何以馭夷奉旨確估惟究虛冒非定後來價例

何得云恐以減價藉口反爲厲階置買驗收雖係
前官該撫道不行發覺何辭通同姑且不究卽着
會同軍視巡檢將見估及該鎮庫貯貨物通行挨
查覈算嚴提經管員役勒限追賠究擬仍查歷來
撫道職名詳開奏奉不諱隱漏延徇該衙門知道
欽此

三查考選各官開復緣繇疏

題爲遵

旨詳查考選各官開復前後緣繇以祈

聖鑒事戶科抄出該臣部題爲遵

旨再查考選各官參罰開復顛末事崇禎四年十二
月二十六日奉

聖旨錢糧參罰各官平昔無急公之心臨考躁競屢
旨着該部查明不許隱漏如何依然違徇止以部
寺屬官搪抵還着據實詳查具奏本內侍郎何不

列名顯屬瞻諉姑不究欽此竊惟

國家懸

功令爲勸懲原提醒其軍

國之心外吏藉徵輸以效忠亦自躍於功名之路
故有叅罰卽有開復總以砥礪急公期於完糧
而止至于先後遲速雖有次第要不作差殊觀
也蓋錢糧有多寡地方有難易道里有遠近中
有飛輪源源而浩繁未克報竣則多者不得與
少者論功亦有督催倍勤而瘠疲未可頓轉則

難者不得與易者責效亦有解運逶迤而期會
不免後時則遠者不得與近者爭程臣部執一
法以繩之尚多不及格者何堪於完糧之外而
更有吹求也考選各官先是臣部祇遵

明旨再三詳覈撫按之咨揭俱有的據臣部之開復
俱奉

欽依題

請雖有後先完解總無異同今復奉

旨繩急公於平昔詰躁競於臨考責備賢者自是程

方正論淵微

聖慮誠非茫昧可窺臣等謹就開復歲月言之查開
復在朝

覲之前者凡十一員如直隸丹徒縣知縣今考選南
京吏部文選司主事鄭之尹直隸金壇縣知縣
今考選江西道御史劉宗祥陝西長安縣知縣
今考選兵科給事中孫三傑福建同安縣知縣
今考選吏科給事中曹履恭福建晉江縣知縣
今考選江西道御史姚孫桀廣東陽江縣知縣

今考選候

山西道御史李右謙廣東靈山縣知縣今考選候
命南京禮部主事黃學元廣東饒平縣知縣今考選
刑部山西司主事戈尚友俱於崇禎二年開復
者也直隸江都縣知縣今考選廣東道御史遲
大成直隸興化縣知縣今考選福建道御史王
績燦湖廣零陵縣知縣今考選江西南康府同
知符應乾俱於崇禎三年開復者也以上二三
兩年開復各官計距考選之期尚遠其於

明旨所謂平時不能急公臨考躁競者判乎其不相
蒙自當置之無論內李右謹黃學元戈尚友
完被叅曾經兩廣督臣王尊德代請開復咨疏
并至此又當在

明旨所稱撫按題明不必混入之列者

臣部前疏止

言咨而遺疏自是一時疎漏之過尤當亟爲改
正開除者也又查開復在考選之前者凡十四
員如福建福清縣知縣今考選陝西道御史
堪廣福建海澄縣知縣今考選陝西道御史

應桂福建莆田縣知縣今考選四川道御史
彥芳浙江金華縣知縣今考選河南道御史
倬浙江長興縣知縣今考選南京兵部武選司
主事向鼎河南雒陽縣知縣今考選刑科給事
中尹洗山東臨淄縣知縣今考選兵部職方司
主事耿胤樓浙江蕭山縣知縣今考選南京西
城兵馬余敬中浙江臨海縣知縣今考選兵部
武選司主事萬末康直隸祁門縣知縣今考選
南京大理寺評事朱大雅俱於崇禎四年三月

內開復者也又直隸嘉定縣知縣令考選
道御史謝三賓直隸吳江縣知縣令考選
給事中熊開元直隸華亭縣知縣今考選雲南
道御史鄭友玄湖廣湘潭縣知縣今考選戶部
江西司主事陳文燿俱于崇禎四年四五月內
開復者也以上四年以後開復各官雖開復去
考期不遠而錢糧非臨考始完臣部前疏所謂
或糧完而各題偶滯或罰新而次第輸將次
所謂有完糧已久而開復亦久有完糧雖久

近始開復者蓋實錄也內如周堪賡余應桂
彥芳俱崇禎元年爲督餉御史錢士貴以元年
加派未完叅罰然錢士貴於崇禎二年內復

命已薦各官元二兩年新餉全完今其疏具在也高
倬向鼎耿胤樓萬末康俱崇禎三年爲督餉御
史沈猶龍以二年加派未完叅罰然沈猶龍於
崇禎三年十二月內復

命已薦各官二三兩年新餉通完今其疏亦在也尹
洗元年京邊未完一分爲巡視太倉科院叅罰

及查俱於二年解完到部此外更無參罰則非
怠於催科可知也能開元初以欠糧爲京卿王
慶尹參罰嗣解通完王慶尹卽於崇禎三年十
二月內復

命開復謝三賓元年漕折又完仍被參罰崇禎三年
九月內巡漕龔一程已爲具題開復奉有

俞旨後來臣部特爲重複申明耳朱大雅前以元年
京邊未完一分參罰續奉面質完欠之

旨呈稱全完冊庫查覈是真并與開復者此耳載查

各官俱經撫按具題考滿臣部覆核無異移咨吏部給繇簡查科抄案卷似與撫按題明者亦無大異是則各官殫心職業之內忘情榮進之途完糧本蚤開復稍遲正與躁競不同惟陳文耀鄭友玄俱以調煩已久前任逋賦無從追解別有措補然拮据於及額已徵催科之苦心且代輸於士民愈見循良之左券又安可厚訾也從來臣部錢糧止據完欠爲殿最不以開復分後先卽周瑞豹黔餉已完而復有川貴總督開

復之疏致蒙

欽駁特加降調論者以爲非辜而他可知矣其補解

錢糧一節當朝

覲時奉有順賚續解酌量開復

明旨各官思

明庭奮庸之有地臣部仰

聖明鼓舞之多方一時絡繹完解頗多追憶四年春

初軍餉正匱卒賴接濟是則臨期竭蹶與平昔
料理者又似同出急公也若諸臣避躁競之嫌

而緩納完臣部避躁競之嫌而靳開復厚賞其恬淡之心而薄責其終事之義卽曰無營於功名究竟何裨於軍。

國至於部寺各官臣部原與臺省各官一體詳查併無求多之意兩疏俱在何敢借以搪抵也目今先考諸臣際

盛世之雍熙沐

皇恩於浩蕩久叨甄錄著

明良喜起之風各殫謀謨酬

天地生成之德已昭舊績佇煥新猷若續考諸臣原
無錢糧相關業已徹底清楚今李右謙黃學元
查覈已明中間絕無一人牽帶迺令全谷需次
困頓守株上不能傾堵獻之忱下不能遂策勵
之願使人疑臣部藉

皇上綜覈爲分外葛藤蔽賢病

國罪可勝誅是又臣之所大恐也謹據實詳查具
奏伏冀

聖慈信明綸而一令申庶

盛典不致久稽諸臣感思感奮

堯舜夔龍之會於斯益光矣且等何勝懇切頓

請之至

崇禎五年正月三十日具

題二月初五日奉

聖旨本內臨考開復各官明屬躁狗着該部院詳查
有無撫按咨題分別確議奏奪欽此

題恭明智草場郭昭封疏

題爲監督司屬漁獵有聲謹據所聞糾彈以肅官
箴事竊照臣部設有草場以供秣飼僉有商人
以備召買而又委有監督以司出入故必明核
草束俾軍實充贍優恤商人體民間疾苦斯爲
無負厥職耳年來商役困苦每一僉報如陷湯
火

皇上軫念諸商委曲周摯特

允放商價於

午門通成法於截支臣部督率司屬奉行惟謹夫亦謂不得已而用商務令勞而不怨庶幾無負聖天子惠養元元之意也臣每論諸監督釐奸剔弊惠商裕

國臣部每遇給放商價之期輒先出示曉諭一切衙役書胥不得需索一錢一物妄意監督司屬自當凜凜奉約束矣頃於正月二十九日臣在部投文有告狀人孫奎告爲追究草價急救群命事內稱奎等五十餘人俱係明智場賣草人

戶禍遭經紀張魁庫秤魯善串積蠹朱書辦朋
奸一股夥騙奎等揭債買草上納共該草價錢
七百餘吊迨後領出截支官銀徑自烹吞分文
不給奎等情極奔告巡青科院准送監督衙門
追給詎遭朱書辦設計誘誑領錢巧稟監督通
不問理冤枉無申懇乞提究正法等因據此臣
叅詳告詞似有需索曖昧情弊因而細加查訪
乃知監督主事郭昭封近因僉商一事物議大
騰左右爲奸鈐制無法簠簋弗飭猫鼠同眠有

謂舊例巡青科道審編商役必發監督拘攝本
官於正報外間多牽及親族無干人等予奪且
繇而民間雞犬不寧者誰實導之則書辦朱萬
祚長班寧紀也有謂報到商人巡青科道審係
貧乏卽准釋放而本官每有羈留時加刑拷必
有關說餽遺而後釋放者誰實開之則皂隸齊
應元張秀也有謂截支銀兩本官代爲分派收
買草束因而減給價值多所染指以致孫奎等
赴告者則書辦朱萬祚長班張棟趙魁實從中

用事也有謂得受常例每場至四五百兩雖利窮商脂膏而弗顧者則長班姚福皂隸陳紀實陰爲過付也昭封少年爽氣臣方望其可供驅策不意竟爲宵小誘惑旣騰怨讟之口何辭負乘之羞臣喚本官至部詰問諄讓本官退而具揭投遞大率謂衙門諸役巧肆揩摸新報商人有家實貧寒或係重役知其必放因而乘機需索事不繇已無從隄防等語夫以本官閱歷未深純樞未除中間關防不密線索繇人亦所難

免然而道路悠悠之口又似皆督過於昭封者
臣固不敢輕爲懸坐而又不敢少爲寬假合無
將監督主事郭昭封先行革職仍將本官員下
各役如朱萬祚竇紀張棟姚福張秀齊應元陳
紀張魁魯善等俱

下法司逐一審訊如果本官實有染指卽當并下於
理可也祇因司屬管場有議謹據所聞糾彈伏
惟

聖明鑒察處分施行

原缺

會估薊鎮西協撫賞貨物疏

題爲撫賞已經實查謹據數彙冊隨併撫物

進呈

御覽以憑

聖裁事崇禎四年十二月二十六日戶科抄出監視
薊鎮西協御馬監太監鄧希詔題前事等因崇
禎四年十二月二十四日奉

聖旨據奏西協撫賞情弊甚晰貨物濫惡係何時何
官委買驗收各關庫拖欠銀貨何故向無追補潮

河川板利何故入多報少喫賞各夷部落見存實數若干通着會同督道詳行嚴覈應奏奏的卽行參奏務期徹底清釐以副朝廷固圉綏夷之意潘國俊該督按如何尚未見究報顯屬徇縱附進賞物該部科看議來說該衙門知道欽此欽遵抄出到部該臣等遵

旨會同兵部尚書熊明遇戶科都給事申玄默兵科都給事中汪始亨于正月二十日齊集

東朝房將勦鎮西協賞物行崇文門監督喚集

行人等詳核新舊丈尺逐件公同估計臣等因
加酌裁各登估價在單細開於後該臣等看得
撫賞冒破有年諸鎮發覺一旦當此改絃飭邊
之始宜爲覈估遠慮之圖其係邊委營囑買差
而扣除漁蠹及慮奸弁藉口減估而挑撥教搦
臣等已前于宣鎮會估疏中明以入

告矣今據附進西協撫賞諸物會同確估其色絲雖
非精鮮而較之宣鎮不堪者實大差別除舊粗
衣布概從估裁外內有通衣段帛之類色雖退

而工料頗高估於貯陳之後原價似稍浮若
於新置之時原價恐不足卽各色布大小粗細
不等而原開價亦廉卽今

都城市肆中亦從無數分一錢能買布一疋者然
臣等當覈冒懲奸之會必不敢輕徇浮估以縱
婪委之賸削亦不敢刻意減估以遺承買之後
艱除移咨監視督道詳查置買估收經管職各
另奏外至于喫賞諸部或投于奴或殲于挿已
多竄殞况叛則應革庚午之秋已議斷絕豈有

年年尚支全賞之理塞上武弁影射蠹冒厥罪
可勝誅乎是該鎮之弊又不在于貨物之濫
而尤在撫賞之虛冒也業奉有會同督道嚴
之

旨是在邊臣實實爲

國家省費彙遠大破積習勿徒遺司藏者仰屋無
已時也抑臣等尤有說焉虜貪漢物因以制之
策自漢以來矣其始計不款委

中國有限金錢于不返之壑故半以襍繒物充之

原以

中國中下之貨充禦夷最上之賞使我不大費金
錢而瓊裘亟貪其瑰麗非欲以

中國之實價明示犬羊亦未便以

中國之上珍棄填毳革也假令以

中國一千兩之貨充

朝廷二千兩之賞虜既重視其貨而千餘之扣省應
還歸于

朝廷豈至以

朝廷二千兩之價克夷人一千兩之貨夷既薄視其
賞而強半之瓜分盡侵牟于委弁如今日諸餉
所發覺者哉故今之嚴估者在清冒破以創奸
貪非卽以減估定作後來撫賞之價在懲朽惡
以張表餌非頓更上貨輕開狡夷揀擇之端前
明旨固已悉之自今但使邊臣上下實得其人自能
撫結附夷釐剔賞獎何至月月瓊價
至尊也敢因會估而併及之惟

聖明裁察焉

計開

白馬關

金段一疋原註價一兩三錢今查係青色
織金長一丈八尺濶一尺七寸估值一
兩三錢

紅布一疋原註價一錢二分二釐今查驗
長一丈四尺濶一尺估值一錢

天青段一疋原註價一兩三錢今查係
二丈濶一尺七寸估值一兩二錢

白布一疋原註價八分今查驗長一丈五尺濶一尺估值六分五釐

金裙一條原註價七錢今查係六幅估值七錢

青布一疋原註價一錢三分今查驗長一丈五尺濶九寸估值九分

藍布一疋原註價九分五釐今查驗長一丈五尺濶一尺估值七分

段裙一條原註價五錢五分今查係藍布

六幅估值五錢

羊皮金一張原註價四分今查驗金不真
估值三分

通衣一件原註價六兩五錢今查係袖小
色不甚鮮估值五兩

黑峪關

大金段一疋原註價一兩八錢今查係
色長三丈濶一尺八寸估值一兩七錢
二等通袖一件原註價六兩今查係藍色

袖小估值四兩五錢

金裙一條原評價八錢今查係紅色七幅
稍舊估值六錢

白粗布一疋原註價八分今查驗水滌長
一丈五尺濶一尺估值五分

金裙一條原註價八錢今查係石青色六
幅估值八錢

金裙一條原註價八錢今查係紅色六幅
有麻縷在內估值五錢

青細布一疋原註價一錢一分今查驗長
一丈五尺濶九寸估值九分

藍粗布一疋原註價八分七釐今查驗長
一丈五尺濶九寸估值六分五釐

三等通袖一件原註價五兩五錢今查係
香色稍舊估值三兩

一等通袖一件原註價七兩今查係紅魚
估值七兩

潮河川

色段一疋原註價四錢今查係紅色長

丈七尺濶一尺七寸估值三錢

小金段一疋原註價一兩二錢今查係

七幅估值一兩

遍地金一疋原註價一兩四錢今查係長

一丈八尺濶一尺七寸估值一兩二錢

藍粗布一疋原註價八分五釐今查驗長

一丈五尺濶九寸估值六分

帽段一疋原註價一兩二錢今查係長二

丈濶一尺七寸估值一兩二錢

金衣一件原註價五兩九錢估值五兩

貂鼠皮一張原註價五錢估值五錢

白綾一疋原註價一兩二錢今查係長二

丈七尺濶一尺七寸估值一兩二錢

水獺皮一張原註價五錢今查驗舊壞估

值二錢

補段一疋原註價一兩八錢今查係長二

丈五尺濶二尺估值一兩八錢

白粗布一疋原註價七分五釐今查驗長
一丈四尺濶一尺估值五分五釐

金裙一條原註價八錢今查係石青色六
幅估值八錢

紅布一疋原註價一錢一分今查驗長一
丈五尺濶九寸估值九分

色緋一疋原註價一兩一錢今查係官綠
長二丈八尺濶一尺二寸估值一兩一
錢

狐狸皮一張原註價二錢七分今查係
估值一錢

色糖一條原註價六錢今查係落顏色六
幅估值三錢

紅楊一疋原註價七錢今查係長三丈濶
一尺三寸估值七錢

大水峪

補衣一件原註價八錢五分八釐三毫零
今查係香色估值八錢五分八釐二毫零

零

金裙一條原註價六錢五分今查係石

色六幅估值六錢

色裙一條原註價三錢今查係油綠色六

幅估值二錢

通衣一件原註價三兩一錢四分今查係

真青色估值三兩

漂白布一疋原註價一錢四分今查驗長

一丈四尺濶一尺一寸估值一錢二分

白粗布一疋原註價一錢今查驗長一
七尺濶一尺二寸估值八分

花絹半疋原註價二錢二分五釐今查係
長一丈二尺濶二尺估值二錢二分五
釐

白平機布一疋原註價二錢今查驗長一
丈八尺濶一尺二寸估值二錢

大天青段一疋原註價七錢今查係長一
丈五尺濶一尺六寸估值七錢

遍地金一疋原註價二兩七錢一分五釐
今查係長二丈一尺濶一尺六寸估
二兩七錢一分五釐

大京藍布一疋原註價二錢二分今查驗
長一丈七尺濶一尺二寸估價二錢二
分

藍乾機布一疋原註價一錢五分今查驗
長一丈七尺濶一尺一寸估價一錢三
分

小京藍布一疋原註價一錢五分今查驗

長一丈七尺濶一尺估值一錢五分

簡青布一疋原註價一錢二分今查驗長

一丈七尺濶一尺估值一錢二分

紅乾機布一疋原註價一錢五分今查驗

長一丈七尺濶一尺一寸估值一錢五

分

紅素段一疋原註價三錢五分今查驗長

一丈濶一尺估值二錢五分

崇禎五年二月初五日具

題本月初九日奏

聖旨貨物濫惡無裨實用乃會估與原價不甚相遠
且稱新置尚恐不足何以清釐冒破還着再行核
估確議具奏欽此

回奏山西賚到撫賞文冊疏

奏爲遵

旨回奏事崇禎五年二月初八日該戶科抄出山西
巡撫宋統殷題爲遵

旨據實回

奏撫賞文冊事內稱據岢嵐道周鴻圖行據西路
管糧同知蘇爲梯造完萬曆四十一年起至崇
禎三年止歷年收支過撫賞銀貨文冊二本到
臣臣卽據以轉送戶部訖該臣查得此項文冊

原奉部文取造非係每年應造而今始一稟報也等因二月初六日奉

聖旨據稱該鎮賞冊係奉部文取造該部前疏何得
潤抵歲報冊數着明白奏來欽此欽遵抄出到部
案查本年二月內該山西監視劉允中題爲直
窮撫市不明之因等事內稱准撫臣宋統殷咨
稱水泉紅門市口收支撫賞該道稱歷年前未
造冊亦無報部細查卷案職衙門從無
奏繳之例故亦無送部文冊等因奉

聖旨錢糧奏繳賞冊屬該撫餉冊屬該司前宣大
鎮疏報甚明宋統殷何得稱從無奏繳之例顯
銅弊相沿通同朦溷姑且不究該衙門知道欽此
又該山西巡撫宋統殷題同前事奉

聖旨已有旨了該部知道欽此是該鎮撫賞冊從無
造報該撫已明言之無俟臣贅矣第前奉

明旨詰查歷年用過撫賞錢糧之數該鎮既無冊可
查臣不得不咨取及該撫將十八年撫賞錢糧
之數彙造到部復奉

旨詰查冊籍有無臣查宣大

奏繳冊雖不全尚有存者而山西止有此冊臣不
得不開報非該鎮歷年曾經有冊報部而臣復
取此冊也且臣前回

奏疏內云臣又簡有近日晉撫宋統殷賞到萬曆
四十一年起至崇禎三年撫賞總冊一樣二本
原未敢混抵歲報冊一一見在

御前可覆按也謹明白具

奏統祈

聖明鑒督施行

崇禎五年二月二十二日具

奏三月初一日奉

聖旨該鎮撫賞冊從無造報該部何故久不行查奉
旨詰問始行咨取前疏稱但簡有近日賫到總冊
不言部文取來何辭混抵該部知道欽此



原缺